

**Malaysia-Tajikistan Mahu Perkukuh Hubungan Dua Hala**  
**Bernama**  
**Jun 23, 2014**

PUTRAJAYA, 23 Jun (Bernama) -- Malaysia dan Tajikistan bersetuju menjalinkan kerjasama rapat dalam pelbagai bidang utama bagi membawa hubungan dua hala sedia ada ke tahap baharu yang lebih berkualiti.

Perdana Menteri Datuk Seri Najib Tun Razak berkata kedua-dua negara mengakui pentingnya meningkatkan kerjasama dua hala terutamanya dalam bidang pendidikan, pelancongan, sukan, ekonomi serta sains dan teknologi.

Bercakap pada sidang berita bersama dengan Presiden Tajikistan Emomali Sharipovich Rahmon sempena lawatan negara empat hari beliau ke Malaysia, Najib yakin lawatan itu menandakan satu bab baharu dalam hubungan dua hala yang kukuh antara kedua-dua negara.

"Kami mengadakan perbincangan yang berhasil dan mendalam merangkumi pelbagai isu dua hala, serantau dan antarabangsa yang mempunyai kepentingan bersama.

"Kami menekankan pentingnya untuk membawa perdagangan dua hala ke tahap yang lebih tinggi," kata beliau.

Terdahulu, Najib dan Rahmon menyaksikan pemeteraian lima Memorandum Persefahaman (MoU) dan satu perjanjian untuk memperkukuh kerjasama Malaysia dan Tajikistan.

MoU berkenaan ialah berkaitan rundingan dua hala, kerjasama dalam bidang pendidikan tinggi, pelancongan, latihan fizikal dan sukan serta MoU dengan Majlis Olimpik Malaysia dan Perjanjian mengenai Kerjasama Ekonomi, Teknikal dan Saintifik.

Najib berkata Malaysia juga mengalu-alukan lebih ramai pelajar Tajikistan melanjutkan pengajian mereka di negara ini terutamanya dalam bidang komunikasi.

Pada masa ini, lebih 200 pelajar Tajikistan menuntut di Malaysia.

Beliau berkata kedua-dua negara juga mahu meningkatkan ruang hubungan antara rakyat dan rakyat dan MoU yang dimeterai dapat memudahkan rakyat Tajikistan

mengunjungi negara ini.

"Kita juga akan terus menyokong Tajikistan dalam program latihan dan teknikal," kata Najib.

Sebagai negara Islam, Perdana Menteri berkata Malaysia dan Tajikistan akan menjalinkan kerjasama rapat berhubung isu-isu umat Islam dan berkongsi keputusan bersama.

"Kami bimbang dengan cabaran-cabaran dalam dunia Islam dan kami akan bekerjasama rapat untuk perpaduan," kata beliau.

Perdana Menteri turut mengucapkan terima kasih kepada Tajikistan di atas sokongannya terhadap pencalonan Malaysia bagi kerusi bukan tetap dalam Majlis Keselamatan Pertubuhan Bangsa-bangsa Bersatu untuk penggal 2015 hingga 2016.

Najib berkata Rahmon juga menyampaikan jemputan kepada Yang di-Pertuan Agong Tuanku Abdul Halim Mu'adzam Shah untuk melakukan lawatan balas ke Tajikistan tahun depan.

Ini merupakan lawatan negara pertama Rahmon ke Malaysia sejak Tajikistan dan Malaysia menjalinkan hubungan diplomatik pada 1992.

Turut mengiringi Rahmon ialah Menteri Luar Aslov Sirodjidin, Menteri Pembangunan Ekonomi dan Perdagangan Rahimzoda Sharif, Menteri Pendidikan dan Sains Said Nuriddin, para pegawai kanan dan ahli perniagaan.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1048559>